



**Ўзбекистон Республикаси
Ҳуқуқни муҳофаза қилиш
академияси**



**Ўзбекистон Республикаси
Олий Мажлиси Қонунчилик палатаси
ҳузуридаги Ёшлар парламенти**

**Ўзбекистон Республикаси Ҳуқуқни муҳофаза
қилиш академияси ва Ўзбекистон
Республикаси Олий Мажлиси Қонунчилик
палатаси ҳузуридаги Ёшлар парламенти
ўртасидаги ўзаро ҳамкорлик**

М Е М О Р А Н Д У М И

Тошкент – 2025 йил

**Ўзбекистон Республикаси Хуқуқни муҳофаза қилиш академияси ва
Ўзбекистон Республикаси Олий Мажлиси Қонунчилик палатаси
хузуридаги Ёшлар парламенти ўртасидаги ўзаро ҳамкорлик**

МЕМОРАНДУМИ

Ўзбекистон Республикаси Хуқуқни муҳофаза қилиш академияси (кейинги ўринларда – Академия) бир томондан ва Ўзбекистон Республикаси Олий Мажлиси Қонунчилик палатаси хузуридаги Ёшлар парламенти (кейинги ўринларда – Ёшлар парламенти) иккинчи томондан, биргаликда Тарафлар деб аталувчилар,

Ўзбекистон Республикаси Олий Мажлиси Қонунчилик палатаси Кенгашининг 2025 йил 26 февралдаги “Ўзбекистон Республикаси Олий Мажлиси Қонунчилик палатаси хузуридаги Ёшлар парламенти фаолиятини такомиллаштириш тўғрисида”ги 574-V-сонли Қарори ҳамда Ўзбекистон Республикаси Президентининг 2022 йил 28 ноябрдаги “Жиноятларни тергов қилиш соҳасида малакали кадрларни тайёрлашнинг сифат жиҳатидан янги тизимини жорий этиш тўғрисида”ги ПФ–257-сонли Фармони ва бошқа норматив-ҳуқуқий ҳужжатларда белгиланган муштарак мақсад ва вазифаларга асосланиб,

Бирлашган Миллатлар Ташкилотининг Коррупцияга қарши конвенцияси коррупциянинг олдини олиш ва унга барҳам бериш соҳадаги саъй-ҳаракатлар самарадорлигини таъминлаш учун давлат ташкилотлари бир-бири билан ҳамкорлик қилиши лозимлиги, шунингдек коррупцияни рад этадиган маданиятни шакллантиришга кўмаклашиш тамойили эътироф этилганлигини инобатга олиб,

Ўзбекистон Республикасининг “Коррупцияга қарши курашиш тўғрисида”ги Қонуни билан ҳамкорликда доимий асосда коррупция соҳасида тадқиқотлар ўтказиши белгиланганлигини назарда тутиб,

ёшлар соҳасида қонун лойиҳаларини ишлаб чиқишда олим ва мутахассислар фикрини инобатга олинишини таъминлашга алоҳида эътибор қаратиб,

кенг қамровли идоралараро ҳамкорлик ёшларни коррупцияга тоқатсизлик руҳида тарбиялаш, ёш авлод онгига ҳалоллик кадриятларини сингдириш, ёшларда қонунга итоаткорлик муносабатини шакллантиришга имкон яратишини қайд этган ҳолда,

ўзаро ҳурмат ва ишонч, умумий манфаат ва мақсадлар, масъулият ва ҳолислик принципларига таянган ҳолда, қуйидагилар ҳақида келишиб олдилар:

1-модда. Меморандумнинг мақсади

Ушбу Меморандумдан кўзланган асосий мақсад ёшларни коррупцияга қарши кураш ва унинг олдини олиш фаолиятига кенг жалб қилиш орқали фаоллигини ошириш, ёшларни ҳалол ва қонунга ҳурмат руҳида тарбиялаш, уларни коррупцияга тоқатсизлик руҳида тарбиялашга қаратилган қонунчиликни янада такомиллаштириш, ушбу мақсадда тизимли таҳлилларни амалга ошириш, шунингдек тадқиқот ва таҳлил натижалари юзасидан таклифлар тайёрлаш, кенг миқёсдаги тадбирларни ташкил этишдан иборат.

2-модда. Ҳамкорлик соҳалари

Мазкур Меморандум доирасида Тарафлар қуйидаги йўналишларда ҳамкорликни амалга оширадилар:

коррупцияга қарши курашишда ёшларнинг фаоллигини оширишга қаратилган қонунчиликни такомиллаштириш юзасидан илмий асосланган таклифлар тайёрлаш;

коррупцияга қарши курашиш ва ёшлар масалаларида қабул қилинган қонунчилик ҳужжатлари, давлат дастурлари ва бошқа дастурларда Тарафларга қўйилган вазифаларнинг ижроси самарадорлигини ошириш бўйича ҳамкорлик қилиш;

ёшлар ўртасидаги ҳуқуқбузарликларнинг сабаб ҳамда шарт-шароитларини аниқлаш ва уларнинг олдини олиш мақсадида таҳлилий фаолиятни амалга ошириш;

“Ёшлар – коррупцияга қарши ҳаракат етакчилари” ташаббуси доирасида Ёшлар парламенти аъзоларининг коррупцияга қарши курашиш бўйича қонунчилик таклифлари ишлаб чиқиш, маҳаллий давлат ҳокимияти органларида коррупцияга қарши курашиш бўйича мониторинг ишларида кўмаклашиш;

Ёшлар парламенти аъзолари учун коррупцияга қарши курашишга оид махсус тадбирлар, шу жумладан семинарлар, тренинглар, конференциялар, симпозиумлар ташкил этиш;

Ёшлар парламенти аъзоларига давлат органлари ва ташкилотларининг коррупцияга қарши курашиш соҳасидаги ҳуқуқни қўллаш фаолиятини тизимли равишда ўргатиб бориш;

коррупцияга қарши курашишда ёшлар ҳаракатини кенгайтириш, ёшларга оид қонунчиликни такомиллаштириш юзасидан халқаро ҳужжатлар, энг илғор хорижий тажрибалардан келиб чиқиб ташаббускор режаларни ишлаб чиқиш ва амалга ошириш;

ёшларнинг ҳуқуқий онги ва ҳуқуқий маданиятини юксалтириш, жамиятда коррупцияга нисбатан ҳуқуқий иммунитетни шакллантириш, ёш авлод онгига

ҳалоллик қадриятларини сингдириш;

Ёшлар орасида “Коррупцияга қарши курашиш виртуал академияси” имкониятларини кенг тарғиб қилиш орқали жалб қилинган ёшлар сонини ошириб бориш;

Академия профессор-ўқитувчилари, талабалари ва тингловчиларининг Тарафларнинг фаолияти билан яқиндан таништириш мақсадида бир-бирига сайёр ташрифлар, ўқув машғулотлари ташкил этиш.

Тарафлар келишувига кўра, ушбу Меморандум мақсадига зид бўлмаган бошқа тадбирлар ҳам ўтказилиши мумкин.

3-модда. Ҳамкорликнинг амалга оширилиши

Тарафлар Меморандумнинг 2-моддасида белгиланган ҳамкорликдаги тадбирларни тизимли равишда амалга ошириш мақсадида манзилли ва даврий чора-тадбирлар дастурларини ишлаб чиқади ва тасдиқлайди.

Тарафлар ушбу меморандум доирасида тасдиқланган чора-тадбирлар дастурларини самарали амалга ошириш учун масъул вакилларни ажратади, ҳар бир тадбир бўйича аниқ ижрочиларни, даврий муддатларни белгилайди, зарурат бўлганда ишчи гуруҳлари тузади, уларнинг таркибига ҳамкорларни киритиш чораларини кўради.

4-модда. Молиявий масалалар

Ушбу Меморандумнинг шартлари жамоатчилик асосида ташкил этилади ва моддий харажатларни талаб этмайди.

Меморандум доирасидаги чора-тадбирларни амалга оширишда юзага келиши мумкин бўлган харажатлар ҳар бир Тарафнинг ўзига тегишли қисми бўйича ёхуд ўзаро келишувга мувофиқ қопланади.

5-модда. Ўзгартириш ва қўшимчалар

Ҳар бир Тараф ушбу Меморандумга ёхуд унинг бир қисмига ўзгартириш ёки қўшимча киритишни ёзма равишда таклиф этиши мумкин.

Тарафлар ўзаро келишган ҳар қандай ўзгартириш ва қўшимчалар ёзма равишда ушбу Меморандумнинг ажралмас қисми ҳисобланадиган ва Тарафлар белгиланган кундан бошлаб кучга кирадиган баённома шаклида расмийлаштирилади.

6-модда. Низоларни ҳал қилиш

Мазкур Меморандум қоидаларини талқин қилиш, бажариш ва қўллашда Томонлар ўртасида вужудга келадиган ҳар қандай

келишмовчилик ёки низолар ўзаро маслаҳатлашувлар ва (ёки) музокаралар йўли билан дўстона равишда ҳамжиҳатлик асосида ҳал қилинади.

Тарафларнинг ушбу Меморандумни имзолашлари улар учун ҳеч қандай юридик мажбуриятларни юклатмаслиги ва молиявий мажбуриятларни вужудга келтирмаслиги ҳақида келишиб олдилар.

**7-модда. Меморандумнинг кучга кириши,
амал қилиши ва ўз кучини йўқотиши**

Ушбу Меморандум имзоланган кундан бошлаб кучга киради ва навбатдаги парламент сайловига қадар амал қилади.

Янги парламент шакллангандан сўнг, Академия ва Ёшлар парламенти ёзма равишда келишган ҳолда мазкур меморандумни амал қилишини кейинги сайловга қадар узайтириши мумкин.

Тарафлардан бири Меморандумдан чиқиш истагини ёзма равишда иккинчи Тарафга жўнатади ва уни амал қилиш муддати 3 (уч) ойдан сўнг тўхтатилади. Бунда Меморандум доирасида тасдиқланган амалдаги чоратadbирлар дастурлари ҳам ушбу муддат тамомланган кунда тўхтади.

Ушбу Меморандум 2025 йил 26 ноябрь куни Тошкент шаҳрида ўзбек тилида бир хил икки асл нусхада тузилди.

**Ўзбекистон Республикаси
Ҳуқуқни муҳофаза қилиш
академияси бошлиғининг
биринчи ўринбосари**

Е.В. Коленко

Тошкент шаҳри,
Рихсий кўчаси, 9-уй

**Ўзбекистон Республикаси
Олий Мажлиси Қонунчилик
палатаси ҳузуридаги
Ёшлар парламентининг раиси**



О.Й. Собитов

Тошкент шаҳри,
Бунёдор шоҳ кўчаси, 1-уй